



Broj: 13-11-6790/25
Sarajevo, 24.12.2025. godine

Na osnovu člana 69. Statuta Općine Centar Sarajevo – prečišćen tekst („Službene novine Kantona Sarajevo“, broj 23/04), Općinski načelnik donosi

ODLUKU
o poništenju Javnog poziva za dodjelu sredstava organizacijama u oblasti
vrhunskog sporta

I

Poništava se Javni poziv za dodjelu sredstava organizacijama u oblasti vrhunskog sporta.

II

Ova Odluka stupa na snagu danom donošenja i ista će biti objavljena na web stranici Općine Centar Sarajevo.

O b r a z l o ž e n j e

Općina Centar Sarajevo je dana 2.12.2025. godine na web stranici Općine objavila Javni poziv za dodjelu sredstava organizacijama u oblasti vrhunskog sporta, broj: 13-11-6790/25 godine, u cilju afirmacije vrhunskog sporta i postizanja vrhunskih rezultata organizacija u sportu koje su registrovane na području općine Centar Sarajevo.

Članom 10. stav (11) Pravilnika o kriterijima za dodjelu sredstava organizacijama u sportu sa ciljem provođenja javnog interesa Općine Centar Sarajevo u oblasti vrhunskog sporta („Službene novine Kantona Sarajevo“, broj: 50/25) (u daljem tekstu: Pravilnik) utvrđen je način razmatranja prigovora, na način da će pristigle prigovore razmatrati Komisija za obradu i analizu pristiglih prijava na Javni poziv za dodjelu sredstava za oblast vrhunskog sporta na području Općine Centar Sarajevo, koju imenuje Općinski načelnik iz reda državnih službenika, i koja će u roku od tri (3) dana od dana ulaganja prigovora odlučiti o istom.

Objavljeni Javni poziv u tački VI utvrđuje način razmatranja prigovora na način da će pristigle prigovore razmatrati Komisija, koja će u roku od tri (3) dana od dana ulaganja prigovora odlučiti o istom. Nakon donošenja odluka po prigovorima, donijeće se konačna Odluka o dodjeli sredstava koja će se objaviti na službenoj web stranici Općine, nakon čega će Općinski načelnik sa korisnicima budžetskih sredstava sklopiti ugovore kojima će se detaljno odrediti prava i obaveze ugovornih strana.

Tačka 62. Smjernica o minimalnim standardima dodjele budžetskih sredstava putem transfera i subvencija u Federaciji BiH („Službene novine FBiH“, broj 37/24) utvrđuje mogućnost naknadnog uvida i prigovora na način da davalac budžetskih sredstava u slučajevima rješavanja o prigovoru o dodjeli budžetskih sredstava primjenjuje odredbe važećih propisa o rješavanju prigovora.

Tačka 63. Smjernica utvrđuje da je davalac budžetskih sredstava za rješavanje prigovora obavezan poduzeti sve potrebne aktivnosti za rješavanje prigovora u što kraćem roku, odnosno roku ne dužem od 15 dana od dana prijema prigovora ukoliko posebnim zakonima i/ili drugim pravilima nije drukčije određeno. Prigovor u pravilu ne odgađa izvršenje odluke i nastavak provođenja postupaka dodjele.

Tačka 14. Smjernica utvrđuje da davatelji budžetskih sredstava osiguravaju organizacijske kapacitete i ljudske resurse za provođenje postupaka planiranja (utvrđivanja prioriteta), odabira, ugovaranja, praćenja provođenja i evaluacije rezultata utroška sredstava dodijeljenih putem transfera i/ili subvencija iz svoje nadležnosti. Kapaciteti podrazumijevaju da davatelj budžetskih sredstava razdvoji aktivnosti selekcije, ocjene zaprimljenih prijava, rješavanja prigovora i žalbi i evaluacije efekata i namjenske potrošnje.

Iz svega navedenog slijedi da je u Pravilniku predviđeno da ista komisija obrađuje i analizira pristigle prijave, te razmatra eventualne prigovore, te da u tekstu Javnog poziva nije navedeno puno ime Komisije koja razmatra pristigle prigovore.

Osim toga, Smjernice o minimalnim standardima dodjele budžetskih sredstava putem transfera i subvencija u Federaciji BiH, oblast podnošenja prigovora uređuju kroz primjenu odredbi važećih propisa o rješavanju prigovora, na način da davatelj budžetskih sredstava razdvoji aktivnosti selekcije, ocjene zaprimljenih prijava, rješavanja prigovora i žalbi i evaluacije efekata i namjenske potrošnje.

U cilju usklađivanja teksta Pravilnika sa Smjernicama o minimalnim standardima dodjele budžetskih sredstava putem transfera i subvencija u Federaciji BiH, odlučeno je kao u dispozitivu.

Dostavljeno:

1. Evidencija
2. Arhiva

